

al-Masīh Par Īmān

Yih Kyā Hai?



al-masīh par īmān: yih kyā hai?

What Does it Mean to Believe in al-Masih?

by Bakhtullah

[Ao, Khud Dekh Lo 24]

(Urdu—Roman script)

© 2024 www.chashmamedia.org

published and printed by

Good Word, New Delhi

The title cover is derived from waldryano
<https://pixabay.com/illustrations/resilience-victory-force-1697546/>.

Bible quotations are from UGV.

for enquiries or to request more copies:

askandanswer786@gmail.com

Fahrist

Īsā Masīh ko Haqīr Mat Jāno	2
Kufr ke Bure Natije	4
Apnā Īmān Chhipāe Mat Rakho	6
Nūr Pākar Tārīkī se Bacho	7
Use Dekhte Raho	8
Us kī Sunte Raho	9
Injīl, Yūhannā 12:37-50	13

Jab Īsā Masīh ākhirī bār Yarūshalam meñ dākhlī huā to uskā purjosh istiqbāl huā. Log k̄hushī manāne lage. Unheñ lagā ki Īsā Masīh bādshāh bankar dushman ko mulk se haṭā degā. Lekin us ne aisā na kiyā. Us ne unheñ batāyā ki merī rāh halīmī kī rāh hai. Is ke bād wuh chhip gayā. Yoñ uskī khul-e-ām k̄hidmat ik̄htitām par pahuñchā. Us waqt se wuh sirf apne shāgirdoñ ke mahdūd dāyire meñ tālīm dene lagā.

Is se pahle ki Yūhannā yih ākhirī bāteñ pesh kartā hai wuh Masīh kī āmad kā maqsad aur kalām thoṛe lafzoñ meñ dohrātā hai.

► *Yūhannā is jagah par yih k̄hulāsā kyon pesh kartā hai?*

Yūhannā hameñ sāf dikhānā chāhtā hai ki Īsā Masīh par imān kyā chīz hai. Pahlī bāt,

Īsā Masīh ko Haqīr Mat Jāno

Īsā Masīh ne yih tamām ilāhī nishān logoñ ke sāmne hī dikhāe. To bhī wuh us par īmān na lāe. Kitnī baṛī tragedy! Us ne itne mojize kar dikhāe the, to bhī aksar log īmān na lāe. Sab uskā kalām sunkar dang rah jāte the. Un ke dīnī rāhnumā to is tarah kī bāteñ nahīñ karte the. To bhī aksar log īmān na lāe.

► *Īmān na lāne kī kyā wajah thī?*

Īmān na lāne ke pīchhe ek rūhānī haqīqat thī. Sadiyoñ pahle Yasāyāh nabī farmā chukā thā ki

Ai Rab, kaun hamāre paighām par
īmān lāyā?

Aur Rab kī qudrat kis par zāhir huī?
(Yūhannā 12:38; Yasāyāh 53:1 se)

► *Is ke pīchhe rūhānī haqīqat kyā hai?*

Aksar log Ḳhudā ke kalām par īmān nahīñ
lāeñge.

► *Jab log uskā kalām haqīr jānte haiñ to kyā Ḳhudā
ko is se koī farq nahīñ paṛtā?*

Use zarūr farq paṛtā hai. Yūhannā, Yasāyāh nabī kā hawālā lekar farmātā hai,

Allāh ne un kī ānkhoñ ko andhā
Aur un ke dil ko be-his kar diyā hai,
Aisā na ho ki wuh apnī ānkhoñ se
dekheñ,
Apne dil se samjheñ,
Merī taraf rujū kareñ
Aur main unheñ shafā dūñ.
(Yūhannā 12:40; Yasāyāh 6:9-10 se)

- *Jab koī Ḳhudā kā kalām haqīr jāntā hai to Ḳhudā kā kyā jawāb hai?*

Ḳhudā hone detā hai ki aisā shaḳhs rūhānī bātoñ ke lie itnā andhā aur be-his ho jāe ki wuh āindā shāyad hī taubā karke rūhānī shafā pāe.

- *Yūhannā logoñ kā kufr kyon itnī saḳhtī se pesh kartā hai?*

Wuh nahiñ chāhtā ki ham Īsā Masīh kā kalām aur kām haqīr jānane se us najāt se mahrūm rah jāeñ jo Īsā Masīh ke wasīle se miltī hai. Āge wuh kufr ke bure natījoñ par aur zor detā hai.

Kufr ke Bure Natīje

Yūhannā farmātā hai ki

Yasāyāh ne yih islie farmāyā kyonki us ne Īsā kā jalāl dekhkar us ke bāre meñ bāt kī. (Yūhannā 12:41)

- *Yasāyāh nabī to kāī sadiyon pahle mar chukā thā. Us ne kis tarah Īsā Masīh kā jalāl dekh liyā thā?*
- Yūhannā kā kahnā hai ki Ḳhudā aur Īsā Masīh kā jalāl ek hī hai. Jahān Ḳhudā bāp hai wahān Ḳhudā beṭā bhī hotā hai. Jab nabī ne royā meñ Ḳhudā kā jalāl dekhā to us ne Īsā Masīh kā jalāl bhī dekhā.

Yoñ Masīh kā jalāl nabī par zāhir huā. Tab Ḳhudā ne farmāyā ki merā paighām sunākar tū logon ke dilon ko be-his kar ḍālegā. Nabī ne pūchhā ki main kab tak kalām sunāūñ? Use jawāb milā ki us waqt tak ki mulk ke shahr wīrān-o-sunsān, us ke ghar ḡhairābād aur us ke khet banjar na hon (Yasāyāh 6:11). Yih peshgoī nabī ke jīte-jī pūrī

huī: Isrāīl barbād huā aur qaum muḳhtalif mulkoñ meñ tittar-bitttar huī.

► *Yūhannā is hawāle se kyā kahnā chāhtā hai?*

Jis tarah Isrāīliyoñ ne Yasāyāh nabī kā kalām rad kiyā thā usī tarah aksar logoñ ne Īsā Masīh kā kalām rad kiyā hai. Yasāyāh nabī kā paighām rad karne se logoñ ke dil rūhānī sachchāiyoñ ke lie andhe ho gae aur natīje meñ pūrā mulk tabāh huā. Isī tarah Īsā Masīh kā kalām rad karne se logoñ ke dil rūhānī sachchāiyoñ ke lie andhe ho gae aur bād meñ pūrā mulk barbād huā, be-shumār Yahūdī muḳhtalif mulkoñ meñ tittar-bitttar hue.

► *Kyā āp samajhte haiñ ki Īsā Masīh ek azīm nabī hai aur bas?*

Yih kāfī nahīn hai. Is se najāt nahīn milegī. Is se āp gunāh ke bure natijoñ se nahīn bacheñge. Is se āp Ḳhudā kī nazar meñ mañzūr nahīn ho jāeñge, āp jannat meñ dāḳhil nahīn ho pāeñge.

Lekin Yūhannā hamēñ ek aur qism kī be-īmānī se bhī khabardār rakhnā chāhtā hai. Wuh farmātā hai ki

Apnā Īmān Chhipāe Mat Rakho

Pūrī qaum ne to Īsā Masīh ko rad nahīñ kiyā thā. Kāfī log us par īmān rakhte the. Kuchh rāhnumā bhī un meñ shāmil the, hālāñki wuh dūsroñ ke bāis yih bāt khule taur se nahīñ kahte the.

► *Yih rāhnumā kyon khule taur se nahīñ kahte the ki ham īmān rakhte haiñ?*

Yūhannā farmātā hai ki wuh nahīñ chāhte the ki unheñ Yahūdī jamāt se nikālā jāe. Wuh Allāh kī izzat kī nisbat insān kī izzat ko zyādā azīz rakhte the.

► *Is se ham kyā sīkhte haiñ?*

Un logoñ jaise mat bano jo īmān to lāe the phir bhī yih bāt chhipāe rakhte the. Jab ham apnā īmān chhipāte haiñ to ham Īsā Masīh ko dukh pahuñchāte haiñ. Yūhannā farmātā hai ki yih

nahīn chalegā ki tum Allāh kī izzat kī nisbat insān kī izzat zyādā azīz rakho.

Ab tak Yūhannā ne khule taur se imān rakhne par zor diyā. Lekin Īsā Masīh par imān hai kyā? Iskā jawāb wuh ab detā hai. Pahle,

Nūr Pākar Tārīkī se Bacho

Īsā Masīh ne farmāyā,

Maiñ nūr kī haisiyat se is duniyā meñ āyā hūñ tāki jo bhī mujh par imān lāe wuh tārīkī meñ na rahe.

(Yūhannā 12:46)

► *Nūr kā andhere par kyā asar hotā hai?*

Jahāñ nūr kī tez raushnī phailtī hai wahāñ andherā dūr ho jātā hai. Jis ke dil meñ nūr basne lage us se andherā dūr ho jātā hai.

► *Nūr kis tarah miltā hai?*

Īsā Masīh par imān lāne se. Wuh khud nūr hai.

► *Us par imān kyon itnā thos hai (āyat 44)?*

Islie ki use **Ḳhudā bāp** se bhejā gayā hai. Jo us par **īmān rakhe** wuh **Ḳhudā bāp** par **īmān rakhtā** hai.

Ġharz, **Īsā Masīh Ḳhudā bāp** se bhejā gayā nūr hai, aur sirf use pāne se insān tārīkī se bachegā. Yon pahlā qadam yih hai ki ham ilāhī nūr yānī Masīh ko pākar us se bhar jāēñ.

► *Ham kis tarah yih nūr pā sakte haiñ?*

Īsā Masīh aur uskā kalām qabūl karne se. Tab yih nūr hamāre andar phailne lagtā, chamakne-damakne lagtā hai.

Dūsri bāt,

Use Dekhte Raho

Īsā Masīh ne yih bhī farmāyā,

Jo mujhe dekhtā hai wuh use dekhtā hai jis ne mujhe bhejā hai.

(Yūhannā 12:45)

► *Ham kis tarah Īsā Masīh ko dekh sakte haiñ?*

Īmān lāne se wuh hamāre dilon meñ basne lagtā hai. Tab ham **īmān meñ** use dekh sakte

haiñ. Aur use dekhkar ham Ḳhudā bāp ko bhī dekh sakte haiñ.

- *Ham Masīh ke zariye Ḳhudā bāp ko kyon dekh sakte haiñ?*

Islie ki wuh Ḳhudā kā nūr hai jo is duniyā meñ bhejā gayā tāki hamen raushan karke bachāe. Ḳhudā bāp sūraj jaisā hai jabki Īsā Masīh uskī raushnī hai, uskā nūr jo is duniyā meñ ā gayā hai. Ham sūraj ko sirf nūr ke zariye dekh sakte haiñ.

- *Ġharz imāndār ko kyā karnā hai?*

Use bas Masīh ko dekhtā rahnā hai jo nūr hai. Masīh ko dekhne se uskī zindagī nūr aur pākīzagī se bhar jāegī. Tīsri bāt,

Us kī Sunte Raho

Insān apnī āñkhoñ se dekhtā hai. Dekhne se wuh Ḳhudā kā nūr pātā hai. Ab Īsā Masīh sunane kī bāt bhī chheṛtā hai: Insān apne kānoñ se suntā hai, tab jawāb meñ chalne lagtā hai. Īsā Masīh ne farmāyā,

Jo merī bāteñ sunkar un par amal nahīn kartā main uskī adālat nahīn karūngā, kyonki main duniyā kī adālat karne ke lie nahīn āyā balki use najāt dene ke lie. To bhī ek hai jo uskī adālat kartā hai. Jo mujhe rad karke merī bāteñ qabūl nahīn kartā merā pesh kiyā gayā kalām hī qiyāmat ke din uskī adālat karegā. (Yūhannā 12:47-48)

Ham bahut kuchh sunane ke ādī ho gae haiñ. Hamāre hukmrān baṛe baṛe wāde karte haiñ jo bād meñ adhūre rah jāte haiñ. Internet ke daur meñ har ek ne apne āpko achchhī tarah pesh karnā sīkh liyā hai. Har ek ne dūsron ko manwāne kā gur apnā liyā hai.

Bahut kuchh sunane meñ ātā hai jo ham sīdhe tāq par rakhkar bhūl jāte haiñ. Aur sach kaheñ to agar aise na karte to bār bār māyūs ho jāte. Islie zarūrī hai ki ham Masīh kī hidāyat par dhyān deñ ki merī suno. Matlab hai merī bāteñ sunkar un par amal karo. Jis ke andar nūr hai wuh khud baḅhud uskī

suntā rahegā. Wuh yih bāteñ mahfūz rakhegā, aur un kā uskī zindagī par gahrā asar paṛegā.

Īsā Masīh kī bāteñ tāq par rakhkar chhoṛeñge to samajh lo ki āp nahīn bacheñge.

► *Āp kyon nahīn bacheñge? Kyā Īsā Masīh ne nahīn farmāyā thā ki main adālat karne nahīn āyā?*

Zarūr. Bāt yih hai ki uskā kalām hī āpkī adālat karegā. Uskā kalām rad karne se āpkī adālat ho chukī hogī.

► *Lekin kyā ham uskī sārī bātoñ par amal kar pāeñge? Kyā kuchh na kuchh adhūrā nahīn rahegā?*

Be-shak. Bāt yih nahīn hai. Amal karne ke pīchhe jo Yūnānī lafz hai uskā matlab mahfūz rakhnā bhī hai. Amal karne kā pahlā qadam Masīh kī bāteñ apne dil meñ mahfūz rakhnā hai. Jab ham nūr kī dhūp señkte rahte haiñ to uskā kalām bhī hamāre dil meñ baiṭhkar phal lātā hai. Baṛī bāt yih nahīn ki ham har bāt par pūre utreñ. Baṛī bāt yih hai ki Īsā Masīh jo

hamārā nūr hai hamāre andar base aur apnī bāteñ harkat meñ lāe. Wuh hamārā azīm ustād hai, aur wuh jāntā hai ki ham us ke kamzor shāgird haiñ. Baṛī bāt yih hai ki wuh hamārā hāth thāme sāth chale.

► *Kyā nūr āpke dil meñ basā huā hai? Kyā wuh āpkā hāth thāme āpke sāth chal rahā hai?*

Yoñ Yūhannā hameñ āgāh kartā hai ki Īsā Masīh ko haqīr mat jāno balki us par īmān lāo. Aur yih īmān chhipāe mat rakho. Kyoñki Īsā Masīh **Nūr** hai, aur nūr kī fitrat yih hai ki wuh phail jāe.

► *Īmāndār ko kyā karnā hai?*

- Pahle, use dekhte raho tāki uskā nūr āp meñ phailtā jāe, āp meñ chamaktā-damaktā rahe.
- Dūsre, uskī āwāz sunkar uskī rāhoñ par chalte raho. Sab se baṛī bāt yih hai ki uskā hāth thāme rakho. Tab jannat kī rāh yaqīnī hai.

Haqīqat meñ Īsā Masīh par īmān sab se mushkil aur sab se āsān kām hai.

► *Us par īmān sab se mushkil kām kyoñ hai?*

Jab ham us ke shāgird ban jāte haiñ to wuh chāhtā hai ki ham apnā īmān chhipāe na rakheñ. Sāth sāth wuh chāhtā hai ki ham uskī rāh par chaleñ. Matlab hai muhabbat kī rāh par. Halīmī kī rāh par.

Lekin us par īmān sab se āsān kām bhī hai.

► *Us par īmān sab se āsān kām kyon hai?*

Hameñ sirf us par īmān lānā hai jo nūr hai. Tab wuh hamāre andar phailkar hameñ apnī muhabbat se bhar degā, hamārā hāth thāme hamāre sāth chalegā. Adālat ke din jab us kā kalām hamārā sāmñā karegā to hameñ koī nuqsān nahīñ pahuñchegā, kyonki hamāre andar basne wālā nūr hameñ bachāe rakhegā. Wuhī hameñ jannat tak pahuñchāegā.

Injil, Yūhannā 12:37-50

Agarche Īsā ne yih tamām ilāhī nishān un ke sāmne hī dikhāe to bhī wuh us par īmān na lāe. Yoñ Yasāyāh nabī kī peshgoī pūrī huī,

Ai Rab, kaun hamāre paighām par īmān lāyā?
Aur Rab kī qudrat kis par zāhir huī?

Chunānche wuh īmān na lā sake, jis tarah Yasāyāh nabī ne kahīñ aur farmāyā hai,

Allāh ne un kī āñkhoñ ko andhā
Aur un ke dil ko be-his kar diyā hai,
Aisā na ho ki wuh apnī āñkhoñ se dekheñ,
Apne dil se samjheñ,
Merī taraf rujū kareñ
Aur main unheñ shafā dūñ.

Yasāyāh ne yih islie farmāyā kyoṅki us ne Īsā kā jalāl dekhkar us ke bāre meṅ bāt kī.

To bhī bahut-se log Īsā par īmān rakhte the. Un meṅ kuchh rāhnumā bhī shāmīl the. Lekin wuh iskā alāniyā iqrār nahīn karte the, kyoṅki wuh ḍarte the ki Farīsī hameṅ Yahūdī jamāt se kḥārij kar deṅge. Asl meṅ wuh Allāh kī izzat kī nisbat insān kī izzat ko zyādā azīz rakhte the.

Phir Īsā pukār uṭhā, “Jo mujh par īmān rakhtā hai wuh na sirf mujh par balki us par īmān rakhtā hai jis ne mujhe bhejā hai. Aur jo mujhe dekhtā hai wuh use dekhtā hai jis ne mujhe bhejā hai. Maiṅ nūr kī haisiyat se is duniyā meṅ āyā hūn tāki jo bhī mujh par īmān lāe wuh tārikī meṅ na rahe. Jo merī bāteṅ sunkar un par amal nahīn kartā maiṅ uskī adālat nahīn karūngā, kyoṅki maiṅ duniyā kī adālat karne ke lie nahīn āyā balki use najāt dene ke lie. To bhī ek hai jo uskī adālat kartā hai. Jo mujhe rad karke merī bāteṅ qabūl

nahīn kartā merā pesh kiyā gayā kalām hī qiyāmat ke din uskī adālat karegā. Kyoñki jo kuchh mainne bayān kiyā hai wuh merī taraf se nahīn hai. Mere bhejne wāle bāp hī ne mujhe hukm diyā ki kyā kahnā aur kyā sunānā hai. Aur main jāntā hūn ki uskā hukm abadī zindagī tak pahuñchātā hai. Chunāñche jo kuchh main sunātā hūn wuhī kuchh hai jo bāp ne mujhe batāyā hai.”